

庶物類纂

竹屬
自三至四

容

太政官文庫			
和書門	特別	第一	類
		二三六二	號
		第五十番	函
四六五	册架		册

内閣文庫			
番號	和	32362	
册數	465 (198)		
函號	特	54	1

四十三

共十八



A 1 2 3 4 5 6 M 8 9 10 11 12 13 14 15 B 17 18 19



Kodak Gray Scale



© Kodak, 2007 TM: Kodak







庶物類纂竹屬卷之三

庶物類纂

卷三

竹屬目次

竹

竹

有草似竹高五六尺淇水側人謂之菴竹也菴竹一
草名其莖葉似竹青綠色高數尺今淇澳傍生此人
謂此為綠竹淇澳二水名

菴○爾雅云菴王芻郭云菴蓐也今呼鷓脚莎某
氏云鹿蓐也鄭云蓋草亦名菴蓐本草唐注云蓋
草葉似竹而細薄莖亦圓小生平澤溪澗之側荆
襄人鬻以染黃色極鮮好洗瘡有効爾雅所謂王
芻爾雅翼云說文曰菴王芻也引詩曰菴竹猗猗

則綠與菘同本草名蓋草俗亦呼淡竹葉所謂終朝采綠不盈一掬者上林賦稱香草云揜以綠蕙被以江籬張揖亦以綠為王芻衛風引以為首蓋必嘉草也而離騷云菘菘施以盈室兮判獨離而不服以三者皆惡草與衛風相反詩騷所取各有義耳

竹○爾雅云竹篇蓄郭註似小藜赤莖節好生道傍可食又殺蟲李巡曰一物二名也孫炎某氏引詩衛風云菘竹猗猗案陶隱居本草註云處處有

布地而生節間白華葉細綠人謂之篇竹鬻汁與小兒飲療虻蟲鄭注即篇竹也韓詩綠薄猗猗薄篇筑也陸德明曰薄篇竹也石經同篇竹亦作扁竹蜀本草云葉如竹莖有節細如釵股生下溼地圖經云春中布地生道旁苗似瞿麥葉細綠如竹赤莖如釵股節間花出甚細微青黃色根如蒿根爾雅翼云九章曰擘大薄之芳蒞兮寧長洲之宿莽惜吾不及古之士兮吾誰與玩此芳草解篇蓄與雜菜兮備以為交佩王逸曰言已解析篇蓄雜

以香茅合而佩之脩飾彌盛也然篇蓄雜菜皆非
芳草逸義非是蓋言解去篇蓄與雜菜而佩芳蒞
宿莽爲交佩爾然則竹又惡物與衛風相反耶又
云篇蓄既似竹則宜謂之竹爾按璣所說則又合
綠與竹爲一草未知其審然古今說者皆言淇水
旁自生竹箭故古人言伐竹淇衛又曰淇衛之箭
如此多矣蓋淇水宜竹箭自古已然然說文引詩
作菴竹韓詩作綠蒿菴既非色而蒿又非竹不可
合爲綠色之竹箭故析而解之云菴王芻蒿篇菴

也然則淇澳自出竹箭不妨兼有菴竹二草耶
綠竹○朱傳云綠色也淇上多竹漢世猶然所謂
淇園之竹是也竹譜云淇園衛地殷紂竹箭園也
淮南子曰烏號之弓貫淇衛之箭毛詩云綠竹猗
猗是也又云植物之中有物曰竹不剛不柔非草
非木或茂沙水或挺巖陸又云竹之別類六十有
一又云竹六十年一易根輒結實而枯死其實落
地復生六年遂成疇埤雅云竹物之有筋節者也
故蒼史制字筋節皆從竹爾雅曰東南之美者有

會稽之竹箭焉今竹性亦喜東南引生故古之種法云劬取東南引根于園角西北種之久之自當滿園語曰西家種竹東家治地言其滋引而生來也易曰方以類聚竹引東南則以卦推之巽為竹矣震東方也故震為蒼筤竹而已蒼筤幼竹也傳曰淇衛箛箛又曰淇衛之箭又曰下淇園之竹以為楫伐淇園之竹以為矢蓋淇之產竹土地所宜故風人以此美武公之德也詩曰瞻彼淇澳綠竹猗猗瞻彼淇澳綠竹青青竹之初生其色綠長則

綠轉而青矣卒章又曰如簧言盛也則又明其為竹矣說文竹冬生草也圓質虛中深根勁節其種大小不一字從倒艸竹草也而冬不死故從倒艸按綠一作菴王芻也竹一作藹篇蓄也毛韓說皆同而竹譜朱傳皆以為即漢書淇園之竹酈道元云淇川無竹惟王芻篇草不異毛興劉執中云淇水之旁至今多美竹豈淇園之竹在後魏無復遺種而至宋更滋茂乎然據兩漢書淇澳有竹據水經注有王芻篇草毛韓朱三家各自可通陸璣又

以綠竹爲一草名古今並無從其說者今木賊艸醫方通用木工以治器但無華葉寸寸有節與陸說有葉者稍殊未知卽一物否也爾雅釋蕩莽等在草中然實非草類王元美所云竹于草木如魚于鳥獸是也其類至多山海經帝俊竹共谷竹鉤端竹尋竹禮斗威儀篔竹吳越春秋晉竹述異記斑竹孤竹孝竹呂覽嶰谷竹南都賦鐘籠篔篹篠簞籥箏吳都賦篔簹林欵桂箭射筒柚梧篔篹竹譜單名者籥篔簹棘單苦甘弓筋筇篔篹蓋狗蘆

箬之屬雙名者蘇麻般腸百葉雞脰篔篠之屬廣志有雲母攤篔漢利之屬酉陽雜俎有函簾之屬筍譜至八十五種竹筍及諸方志有疎節人面繇貓叢澀碧玉電斑之屬難以具載然多出交廣荒外非詩人所盡見也竹田曰篔竹胎曰筍竹膚曰篔竹皮曰筠竹裏曰箬竹枝曰箇竹約曰節剖竹未去節曰籜竹死曰箬竹有雌雄雌者多筍五月十三日謂之竹醉日栽竹多茂盛其性惡寒好温故曰九河鮮育五嶺實繁然處處有之不似篇蓄


但盛于淇川也上文皆馮嗣宗辨證可謂詳明博雅矣但遍搜陸疏刻本並未載木賊惟馮本多其草澀礪可以洗攪芴及盤枕利于刀錯俗呼為木賊數語因多木賊草一辨然木賊產于秦隴間不聞產于淇衛未知昔人何以云然明毛晉陸疏廣要月今日短至則伐木取竹箭注云陰盛則材成故伐而取之大曰竹小曰箭明彭大翼山堂肆考交廣志雲母竹大竹也攤竹細而多刺也篋竹堪作笛竹與笋皆有毛簷竹宜為屋椽蔓竹皮青面白如

雪軟韌可為索箒竹可為舟漢竹大者一節受一斛小者數升為裊榼利竹蔓生實中堅韌箨竹實中強勁有毒刺虎中之即死笋亦內實明陳希顏事言要玄集

機謹按彙苑詳註引廣志面白作內白


虞衡志竹釜徭人所用截大竹筒以當鑪鼎食熟而竹不蓋物自爾非異也同上

竹說文冬生草字从倒艸象形下垂然實非艸非木自為類竹物之有筋節者故筋節皆从竹禹貢曰揚州篠簜既敷周官孤竹之管孫竹之管詩瞻彼淇澳



綠竹猗猗次章青青末章如箬竹初生色綠長則綠轉青如箬盛密也記曰禮器是故大備大備盛德也其在人也如竹箭之有筠蓋如切如磋如琢如磨則禮器禮器大備也雅詠竹苞竹性叢生鞭深遠故曰苞爾雅曰東南之美者有會稽之竹箭焉竹箭亦喜東南引而生故種法剷取東南根於園角西北種之語曰西家種竹東家治地言其滋引而生也震東方故為蒼葭竹蒼筤幼竹也人蒔竹必芟其繁亂使不分乃茂擢曰洗竹竹六十年根輒易即華實而枯死

曰伏實落於土六年復生竹萌曰筍筍从旬旬內為筍旬外為竹又筍生旬有六日而齊也竹房委地者曰籜竹箭曰篠月今日短至則取竹箭可為箭蕩可為幹筱可為矢竹譜云節間三尺堅勁中為矢考工記曰妣胡之筈矢人相筈欲生而搏山海經曰衛丘山南舜竹林在焉大可為舟江寧慈母山積石臨江生笙簫竹圓緻異他竹廣志雲母竹大竹也攤竹細而多刺箴竹中笛箬竹宜屋椽篔竹皮青內白軟韌宜索漢竹大者一節受一斛小者數升利竹實中堅



勑邛竹出邛山張騫西至大夏所見也今江以南有
貓竹笋如貓頭故名長大堅壯人去其皮比之以為
筏中分破剝去其節為屋嫩者造紙筆竹可絲以制
器可刺船斑竹有斑痕紫竹色純紫小者可制簫笙
白竹可簞苦竹一種膚厚內實一種長勁充鎗戟江
南竹麤大堅直可制器方竹形方可杖慈竹水黃竹
可籬實竹可筆箴竹節疎而直可箭觀音竹莖小叢
生庭中盆石間種之可玩篁竹可笛竹類甚多唯篁
竹苦竹淡竹入藥淡竹者菘竹也有蕭蓄亦竹類赤

莖節葉如竹莖有節細如釵股生下溼地明鄧元錫函史

樂工許雲封善笛自云學於外祖李牟韋應物守任
城見之示以家藏古笛云天寶中得於李供奉者云
封熟示曰此非外祖所吹笛也公問何以驗之雲封
言取竹之法以今年七月望前生者明年七月望前
伐過期則音窒不及期則音浮浮者外澤中乾受氣
不全則其竹夭此笛竹之夭者遇至音必破令試吹
之雲封舉笛吹六州遍一疊未盡笛忽中裂公嘆異
之明慎懋官華夷花木鳥獸珍玩考

新羅神文王時東海中有小山浮水隨波往來王異之泛海入其山上有一竿竹命作笛吹此笛則兵退病愈旱雨雨晴風定波平號萬波息笛今亡同上

說文云竹冬生也象形下者箬若也凡竹之屬皆從竹竹性堅剛經霜雪而不改柯易葉及斬斷而不能接續未出土先有節虛心明鄒善長彙苑詳註

詩瞻彼淇澳綠竹猗猗毛註云澳隈也箬王芻也竹篇竹也又陸璣云淇澳二水名箬竹一草名其莖葉似竹青綠色高數尺詞賦皆引漪漪入竹事誤也按

傳曰淇衛箬籥又曰淇衛之箭又下淇園之竹以為棗又伐淇園之竹以為矢是淇之產竹自古而然詩曰綠竹漪漪言竹之初生其色綠也長則綠轉而青矣故曰綠竹青青卒章又曰如箬如箬言其盛也故謝莊竹贊亦曰瞻彼中堂綠竹漪漪毛陸之說未可

從明焦弱侯焦氏筆乘

高潘有疎節之竹六尺而一節黎母山有丈節之竹瓜州有無節之竹羅浮有龍公之竹臨賀有十抱之竹濡州有扁竹占城有藤竹員丘有船竹東方有弓

竹焉邽曲如藤得木乃倚南荒有沛竹焉其長百丈

明朱國禎湧幢小品

成都有竹青黃相間謂之黃金間碧玉辰州有龍孫竹生山谷間高不盈尺細僅如鍼桃源山有方竹湖湘間有徑尺之竹可以甌羅浮山有龍公竹其大徑七尺一節長丈二尺葉若蕉

同上

熊耳山有丹青竹其葉黃碧母相間交廣有思摩竹筍自節生筍既成竹至春節中還復生筍黑竹如藤長丈八尺色黑如鐵每節長二三寸名觀音竹產占

城國同上

杜子美有從韋明府續處覓錦竹兩三叢詩黃鶴注云考竹譜竹記無錦竹意以其文如錦名之竹紀有蒸竹箇墮竹其皮類繡豈即此乎余觀錦竹他無見惟杜詩有之劉會孟批杜錦樹行云題曰錦樹使人刮目錦竹亦新惜無拈出者耳近閱梅宛陵集錦竹詩曰雖作湘竹紋還非楚筠質化龍徒有期待鳳曾無實本與凡草俱偶親君子室又注其下云此草也似竹而斑始知黃鶴有金注之昏耳

明楊升菴先生文集

竹譜曰竹之品類六十有一述其常品記之志林云
竹有雌雄雌者多笋故種竹半擇雌者物不逃於陰
陽可不信歟凡欲識雌雄當自根上第一枝觀之雙
枝是雌即出笋若獨枝者是雄冬至前後各半月不
可種植蓋天地閉塞而成冬種之必死若遇火日及
西南風則不可花木亦然凡種竹處當積土令稍高
於傍地二三尺則雨潦不侵損錢塘人謂之竹脚竹
有醉日即五月十三日也齊民要術謂之竹醉日岳
州風土記謂之龍生日種竹以五月十三日為上是

日遇雨尤佳一云用辰日山谷所謂根須辰日劬笋
看上番成又一云宜用臘日杜少陵詩東林竹影薄
臘月更宜栽予觀諺云栽竹無時雨過便移多雷宿
土須記南枝則三說皆拘也又法三兩竿作一本移
種其根自相扶持尤易活也凡竹與菊根皆長向上
添泥覆之為佳竹雷三去四蓋三年雷四年者伐去
竹以五月前血忌日三伏內及臘月斫者不蛀竹之
滋澤春發於枝葉夏藏於幹冬歸於根如冬伐竹經
日一裂自首至尾不得全完夏機謹按華夷花木鳥獸珍玩考作盛夏



伐之最佳但鞭背爛然要好竹非盛夏伐之不可七
八月尚可自此滋澤歸根而不中用矣說文竹節曰
約古云渭川千畝竹其人與千戶侯等史記竹得風
其體夭屈謂之竹笑竹荀陸佃云字從勺從日包之
日為荀解之日為竹又曰字從竹從旬旬內為荀旬
外為竹也其上番下番言竹有上番下番即今言大
番小番也番去聲謂大年生笋多小年生笋少也杜
詩會須上番看成竹蔡夢弼注不知此義乃云上番
音上管蜀名竹叢曰林管誤之甚矣既不識竹又不

識詩真瞎子也何以注為非萬玉主人不知此妙高明

濂遵生
八歲

竹復死曰筍觀山海經曰竹生花其年便枯竹六十
年易根易根必花結實而枯死實落復生六年而成
町子作蕙機謹按華夷花木
鳥獸珍玩考作穗似小變機謹按華夷花
木鳥獸珍玩考
作其治法於初米時擇一竿稍大者截去近根三尺
許通其節以糞實之則止又一種法先將竹斫去本
止雷二三寸填土硫黃在管內覆轉根反居上用土
覆之當年生笋又種竹訣曰深種淺種稀種密種謂

之四法深種者土要培厚淺者以墩置地上種之不
必掘潭稀者每墩排開密者須擇竹叢三五枝一墩
者移來此亦巧妙語乃善種法也同上

竹未嘗香也而杜子美詩云雨洗娟娟靜風吹細細
香雪未嘗香也而李太白詩云瑤臺雪花數千點片
片吹落春風香出韻語陽秋予亦謂雨未嘗香也李

賀四月詞依微香雨青氛氲吳郡皇甫庸
近峯聞畧

竹之屬曰猫竹 水竹 綿竹 江南竹 鳳尾竹

羅漢竹明陳雷謝肇
淵鼓山志

鄆人剗大竹傾春釀于中號鄆筒酒川中至今以占
米或黍七分高粱三分以五加尖釀之闕名錦里新
聞說鄆

石田好竹者也闢水南隙地因字其中將以千本環
植之然未易卒致作化竹疏皆六四文明陳眉
公筆記

竹得風其體大屈謂之竹笑明陳繼儒
珍珠船

竹根穿塔以阜角刺或芝麻稽或官桂末埋砌中則

竹根止此矣明馮應京
月令廣義

六月斫竹不蛀山居四要
盧翰月令通攷

格物總論竹中虛白膜外皮青綠色或黃或紫或斑

駁文或小或大或長或短種族最多未易枚數也大抵皆自根而莖莖皆有節莖間節處生枝每兩之枝亦有節枝間節處生葉葉每三之然初出地為筍節節有籜包之及成莖抽之而籜遂漸次脫落處自然有粉歲久而茂茂則成林葱翠交加最為可愛至於雪霜摧壓不改也按山海經竹六十年一易根易根必經生花生花必結實結實必枯死及實落土又復生之此言諒為不妄合璧事類環慶間不復見竹蓋極寒竹不宜耳故有司朴人多

用柳木板惟邠州使院齋前有竹二叢過此者皆詩以詠之又邊地有草狀如益母而莖多白毛毛著人肉痛不可忍問之名線麻地產此草則無毒蝎又嘗馬行塞外見沙中有草白色其葉如蘭而一花著莖上余命控馬卒摘花此卒以雙手拔花至莖斷倒地大都勸甚故勝寒耳世稱竹勝歲寒豈二草更勝于竹邪明姚叔祥見只編○鹽邑志林竹處處有之其類甚多入藥者惟三種人多不能別謹按竹譜篔簹竹堅而節促體圓而質勁皮白如霜即

水白竹也淡竹似篁而茂即甘竹也苦竹有白有紫
李時珍綱目云竹字象形許慎說文云竹冬生草也


故字從倒艸明李中立
本艸原始

斫伐竹木氣全則堅韌宜辰日庚午日血忌日癸卯
日佳諺語云翁孫不相見子母不相離謂隔年竹可

伐臘月斫者最妙六月六日亦得農桑撮要○明
盧翰月令通攷

竹中虛白膜外皮青綠色或黃或紫或斑駁文或小
或大或短或長種族最多大抵皆自根而莖莖皆有
節莖間節處生枝枝每兩之枝亦有節枝間節處生

葉葉每三之竹譜云植類之中有物曰竹不剛不柔
非草非木根幹將枯華復乃縣筴必六十筴亦六十
爾雅東南之美有會稽之竹箭焉又云莽數節桃枝
四寸有節粼堅中簡茶中仲無筴注皆竹類也齊民
要術云竹性愛向西南引故園東北角種之數歲之
後自當滿園諺云東家種竹西家治地為滋蔓而來
生也談聞錄云舊稱竹實鸞鳳所食今近道竹間見
開華小白如棗華亦結實如小麥子無氣味而澀江
浙人號為竹米以為荒年之兆及其竹即死信非鸞



鳳所食也近有江南餘干人來言彼有竹實大如鷄
子竹葉層層包裹味甘勝密食之令人心膈清涼生
深竹林茂盛蒙密處因知鸞鳳之食必非常物也物
理論云金門山竹以爲律管河內葭以爲灰可以候
氣丹陽記云慈母山積石臨江生簫管竹王褒洞簫
賦所云江南之丘墟卽此處也其竹圓緻異於餘處
自伶倫採竹嶰谷其後惟此簫見珍謝靈運山居賦
云其竹則二箭殊葉四苦齊味注云二箭一者苦箭
大葉一者筭箭細葉四苦有青苦者白苦者紫苦者

黃苦者志林云竹有雌雄雌者多筍故種竹當擇雌
者欲識雌雄當自根上第一枝觀之有雙枝者爲雌
卽出筍若獨枝者是雄竹耳爾雅翼云陸璣注淇奧
章合綠與竹爲一草未知其審然古今說者皆言淇
水旁自生竹箭故古人言伐竹淇衛又曰淇衛之箭
又曰下淇園之竹以爲楛伐淇園之竹以爲矢如此
者多矣蓋淇水宜竹箭自古已然又詩卒章曰綠竹
如簣簣牀第以竹爲之其大堪爲簣則非草也然說
文引詩作菜竹韓詩作綠蕒菜旣非色而蕒又非竹

不可合為綠色之竹，箭故折而解之。云菜王芻蕘篇，筑也。又韓詩如箐，乃作如菁，菁積也。薛君云：箐，綠菁盛如積也。兩京賦：芳草如積。亦祖此義。然則淇奥自出竹，箭不妨兼有菜蕘二草。耶竹苞，毛傳：苞，叢生也。考室盤基之厚如竹之叢生也。林孟鳴詩經多識編

庶物類纂竹屬卷之四
竹

蘇
物
類
纂
卷
四

竹

蘇
物
類
纂
卷
四

竹
屬
竹

竹


竹初節岐枝者雌孕筍也記其南枝宜雨種之或去枝或架扶使人糞不便豕通其生花者斫而灌糞可也結實斑文兩相比謂之竹米 趙德麟曰六十年筍復斫而以子種六年而復瘞以死猫能引過墻防過則溝之臥芝蔴稗以竹忌也周子充曰以襍細糖和土種竹茂或以麥拌土宜推之忌足踏冬宜掘旁行筍則直根遠行挑出筍時腐艸覆之又灌以糞則茂畏水又畏大旱山種苗竹向下坡種筍竹向上

糞壤筍美瘠地質堅篁苦淡三種入藥戴凱之譜六十一後人頗有名異實同者清皖桐方氏浮山此藏軒物理小識

機謹按譜當作譜


員丘籥竹崑崙箏竹神異節筴扶南雲母竹節可為船羅浮龍公竹臨賀竹有十抱者漢竹節受一斛交趾梧竹為甌皆大蕩空簡類也黃濟植笏竹東坡咏澀勒卽筴籬竹有刺者服傷竹掌摩竹海南木竹籟策竹皆實心者繇籥叢生蚌蛸根截案面則慈孝類也定海靈峯澧州成都安成奉新澄州皆產方竹八

月出筍節圍小刺又有三稜竹人面竹廬山有匾竹交趾策竹刺虎南方篋箒為矛卽筋竹葉箒之類閩有古散竹皮似椶杜臺卿淮賦有檳榔竹卽棕竹類羅陽竹似芭蕉椶梭本一類也吳都賦篋箒筴卽越女試劍竹葉廣籥箒類也建安篋箒一名箏竹中似人形北戶錄漆州通竹無節馬觀曰占城觀音竹如藤長丈八尺色如鐵每寸二三節利竹亦蔓生若藤弓竹不能自立雲南有垂絲竹襄州臥龍山武侯祠箒竹百尺梢上生葉挾竹卽卽腫節遼葉紫竹斑



竹先青後變齊民要術荒竹黑皮竹汗有文澄州有
黑竹道州瀧中多丹竹宜都飛魚口有紅竹黔陽有
赤岡竹雷州電斑竹瑞筠山竹色如爛銀筭竹頭有
文廣西雪竹大班紅暈梅露細斑也笛簪竹蟲蝕籜
如綉成都黃竹溝青安思苦竹四色當塗縣慈姥山
簫管竹皮白如霜蓋竹亦白皆以色名廣州相迷竹
鏞竹皆生黃甘竹殼薄即江南竹簡簞竹无錫篔如
苦竹永嘉大羅山龍牙竹稀節節輻輳筍箭筒皆箭
篠也九嶷有雙梢竹浙有天親竹末皆兩岐臨海狗

竹毛 竹間雪峯有叢竹漢陽有瘋箬竹薛 記蘇
麻竹桃枝可為席簾竹可為笛筭竹筍煮為布顧微
所云包竹也會稽公孫竹高不盈尺奉化新嶺五寸
白竹辰州龍絲竹盈尺如鍼鳳栖崖小墨竹皆瀟湘
鳳尾類也越王竹乃沙箸石竹碧蟬凝波竹花如榴
皆葉似耳暘谷漫錄安福有十二時字竹殆 書之
乎同上
竹譜竹八月俗謂之小春熱欲去寒欲來氣至而涼
故曰小春往往木有花草有琴竹得是氣也根伸而




達亦謂為鞭行鞭頭為筍俗謂之偽笋清櫟下周亮工因樹屋書

竹香浦在少室之南水邊生竹無他雜樹予偶至林邊聞有香氣非蘭非桂清芬異常蓋竹香也遂題曰

竹香浦嵩書

員丘即路人竹由衙太極雲母濮竹沙摩皆大竹也無節曰通竹長節曰篔簹○晉武昌戴凱之竹譜凡六十一大者員丘帝竹即山海經衛丘俊林竹郭注舜林者也岳山尋竹生焉篔簹與由衙土人用為梁柱

神異經曰竹名太極長百丈南方以為船楫言曰雲丘竹一節為船出扶南即此負丘當作員丘王會曰路人大竹注以潞為赤狄恐在北方無此大竹也河圖曰少室山大竹堪為甌器廣志雲母竹最大李石言漢竹大者一節受一斛晉常璩南中志言寧州有濮竹節相去一丈受一斛許即李石所謂矣元劉美之云桂嶺竹之花出者曰沙摩竹東璧曰有無節竹出漆州空心直上即通竹也竹譜篔簹但云多植水渚智按羅浮山竹節中過丈此東璧所稱篔簹也其



曰龍公竹葉若芭蕉其龍鍾大竹之說乎兩廣今多刺竹竹生卷曲煩猥竹譜名為芭竹李石名為攤竹可作籬笆也嵇云九真交趾出石林竹可切象皮又出簞竹大秦出篋篋以鏑犀象利于鐵東壁謂澀者以錯甲謂之篋篋竹凱之作單今梧州有單竹泥竹之稱單竹可為篋慈孝竹則叢竹四時筍江南竹則葉肥幹薄不可為篋箬葉大可裹粽夾蓬者也竹小者曰鳳尾竹瀟湘竹草木狀言越王竹高尺餘東壁言辰州龍絲竹細僅如絲高不盈尺今廬山有千

里竹高亦數寸而葉不甚小又一種也鄧潛谷載觀音竹種之于盆可玩廣志有觀音竹瓔珞竹析尾竹方竹出君山閩浙詹同以方竹獻取其四稜廉隅益部方物記贊方竹中實但小耳此未見北戶錄澄州之大方竹也紫竹斑竹皆有大有極小如瀟湘竹者廣西僊迴深山有之條竹實心苦竹刺竹及筋竹皆實心瑤星曰洪奠暘谷漫錄載安福西鄉周俊叔者當得十二時竹一根植于家十季餘筍而竹者纔得三枝繞節凸生十二字點畫可數智以此近妖

異如柳葉虫文耳如顧遜園所記華嚴寺佛面竹作筒卽人面竹之大者僧侈其名遂信之邪襍俎言箇墮如綉畫百葉爲一枝五色線引梁簡文修竹賦有玉潤桃枝魚腸金母之名此不足異也魚腸筋竹金母謂黃淡竹也清方以智通雅隋開皇九年吳興柳歸舜自巴陵泛舟遇風吹至君山維舟登岸尋小徑不覺行三四五里興酣踰越磔礪不由徑路忽道傍有大石表裏洞徹圓而徑平周六六七畝其上盡生翠竹圓大如蓋高百餘尺葉洩白

雲森羅映天清風徐吹憂憂爲絲竹音岳州府志

竹董竹葉治欬逆上氣煩熱風痰喉痺嘔吐○根作湯益氣止渴補虛消毒苦竹葉治口瘡目痛酒毒

竹類甚多有毛竹護基竹燕竹貴竹紫竹斑竹金竹方竹葱竹鳳尾竹水竹各種諺云種竹無時雨過便移齊民要術云五月十三爲竹醉日是日種者爲佳勿以脚踏只用槌打壅以馬糞糞糠次年便出笋然竹性向西南須移種東北角忌火日每年冬初宜用田泥壅根若生花結實如稗謂之竹米卽枯死于初時擇一大竿截留二三尺鑽通其節以糞實之則止

一云宜辰日黃山谷云根須辰日劬笋看上番成一
云宜臘月杜少陵云東隣竹影薄臘月更宜栽清石巖逸
叟增定致
富奇書

竹之品有九質厚而堅者為篁竹幹巨而葉細者為
猫竹節長而皮韌者為胎竹幹細皮韌而葉麤者為
篋竹質脆而有斑者為斑竹皆可以適用其有紫竹
鳳尾竹細而叢生者為慈姥竹惟可供庭砌之玩致
道觀中有一種燕竹其巨類猫竹笋特佳有象牙竹
質薄脆不入用其笋亦佳常熟縣志

竹庭砌園亭各有種植河間府志

竹李時珍曰竹惟江河之南有之故曰九河鮮有五
嶺實繁有猫竹方言謂之麻可以椽可以器削之可
以刀其葉夏月可以裹角黍江南竹麤大堅直笋冬
生慈竹古名子母竹斑竹永福縣鶴洋多產之紫竹
小而色純紫苦竹笋苦而味佳淡竹其葉可以藥石
竹可以器筋竹可以弓弩苦油竹可以鎗箭竹可以
箭赤竹可以刺舡方竹可以杖桃枝竹可以席豁竹
可以笛長枝竹可以絲秋竹可以篋含朶竹可以樊

箬葉竹其葉可以蓬人面竹如面釣竹如釣金絲竹如絲蘆竹如蘆鳳尾竹如鳳勒竹枝上有刺中心堅塞枝幹相交蟲竹有蟲焉叢生如蘆每節生蟲如新蟬之未翼外無竅隙隨竹而長竹將枯乃穴傍出福興泉漳之間以竹為器延建汀邵之間以竹為紙竹之笋福興泉漳之間烹而饌之延建汀邵之間蒸而菹之鹽而糟之余嘗游永福縣竹匝地漫山離有間斷至隔絕數里者問之汀邵間皆然一大奇也又福安縣有雷驚竹閩書

斑竹溪在善碇團有竹可燭燃畢無灰相傳昔有人借宿民家辭不納曰孤村無燈燭可照夜其人曰溪前嶺竹皆燭也教取以燃遂傳至今同上隆慶末年隴川有白彘夫婦入山伐竹剖其中有水水中有生魚六七頭持歸烹食夫婦皆化為虎殘害人畜不可計百方阱捕竟不得雲南通志萊公竹公安縣北二里宋寇準貶雷州卒歸葬西京道出公安人皆設祭器於路折竹植地掛紙錢逾月視之枯竹盡生荀衆共立祠歲時享之湖廣總志

曾朝節萬玉山房說博野張公愛竹山房有竹萬箇
題曰萬玉余疑公之愛竹非無取也疏其意問之大
江以南多竹惟北苦寒絕少卽有之視江南竹異乃
愈珍惜焉公居江陵不難有竹亦不難竹至萬何以
玉視竹豈易得者顧反貴歟人情貴賤無常白珩貴
也楚語乃曰楚國無以爲寶今種竹之多愛比於玉
是爲白珩者萬也豈公寶善之寄歟竹之德中虛而
外直體剛而用柔善孰大於是古人有愛竹者取其
能警俗耳不足以窺竹之全夫萬玉備矣或者公之

愛以此也竹之始種也深土而壅之汲水而漑之周
樊而謹護之如此其不可輟也君子植德其身培厚
之以基滋息之以時兢兢乎恐其戕之者自外也何
以異於種竹乎吾見公之凝然定也閤然脩也惕然
祇翼也蓋取諸種竹將所謂觸目警心者非耶夫竹
之生不遽萬吾盡吾力種之矣及春而萌生之多積
歲則至於爲林故能萬也杜陵曰惡竹應須斬萬竿
然則初非任其猥繁耳芟洗其惡而後嘉美林列是
以君子觀於竹得漸之義焉擇之術焉凡公取義於

庶物類纂 卷四

竹或不_二止_一此而此其大也次第問之庶幾有以開我

湖廣通志

筆蘆星竹生青山李白墓陶安詩云鳳管龍笙遺韻

律筆蘆星竹借文章自註云墓上產蘆如筆有竹散

默如星太平府志

昔鐵索橋為寇毀時值嚴冬伐竹夾船以濟師至春

夏竹節間盡長枝葉覆水面若土植者久之不敗雖

云水氣使然然已不根矣枝葉何由茁哉野人言往

歲多旱林竹頻生花結米若粳糯色微紅而味甘民

間多采摘以為食久之則竹枯遂不復生凡竹花則

必旱蓋旱徵也貴州通志

漢初一女浣衣遇水有三節大竹流入足間推之不

去聞內有啼聲持歸破之得一兒育于家長以才武

雄諸彝捐所破竹子野生竹成林遂以竹為姓自號

竹王王與從人嘗止石上命作囊從者白無水王以

劍擊石出水後漸驕恣武帝開西南諸種侯王皆服

乃斬竹王置牂牁郡後封其三子名竹王三郎今通

海有竹王祠雲南通志

庶物類纂

卷四

竹屬

竹

十一

竹之六切音祝植物非艸非木質虛中深根勁節種大小不一分雌雄雌者俗呼母竹多筍性惡寒好溫戴凱之譜六十有一後人增附名異實同如扶南雲母竹可為船桂嶺沙摩竹臨賀竹徑廣十抱海南木竹無節中實澧州成都有三稜竹人面竹廬山有匾竹閩有古散竹皮似稜杜臺卿賦有檳榔竹即稜竹類占城國有觀音竹如藤長丈餘色如鐵每寸二三節雲南有冰絲竹澄州有黑竹道州瀧中有丹竹宜都飛魚口有紅竹黔陽有赤岡竹雷州有電斑竹

當塗縣慈姥山有簫管竹皮白如霜永嘉大羅山有龍牙竹稀節九嶷有雙梢竹浙有天親竹末皆兩岐臨海有狗竹毛在節間會稽有公孫竹高不盈尺辰州有龍絲竹盈尺如鍼安福有十二時字竹又蜀峨眉山菩薩竹結花于節外之枝眉州進士程堂寫其形于中峯乾明寺中羅浮山記第三峯有竹大徑七尺圍節長丈二謂之龍公竹又真臘國風土記竹坡縣數百里其中竹節相間生刺笋味至苦又扶竹武陵山西舊有雙竹院中所產修篁嫩條皆對抽並胤

王子敬竹譜所云扶竹猶海上之桑兩兩相比謂之扶桑也扶竹之笋名合歡爾雅東南之美有會稽竹箭家語南山之竹不揉自直漢食貨志渭川千畝竹與千戶侯等酉陽雜俎李衛公云北都惟童子寺有一竹窠長數尺相傳其寺綱紀每日報竹平安錢道輔曰湘中有斑竹方生時有苔錢封之甚固以艸壤洗去之則紫暈爛斑蘇軾爲文同作篔簹谷偃竹記其略云竹之始生一寸之萌耳而節葉具焉自蜩腹蛇跗以至於劍拔十尋生而有之也今畫竹者節節

而爲之葉葉而繁之豈復有竹乎故畫竹必先得成竹于胸中執筆熟視乃見其所欲畫者急欲從之振筆直逐以追其所見如鵬起鷲落少縱則逝矣與可之教余如此又八音之一周禮大司樂孤竹之管註竹特生者又孫竹之管註竹枝根未生者又陰竹之管註生于北山者又竹頭晉史陶侃都督荆湘嘗造船竹頭皆令籍掌之及桓温伐蜀以竹頭作釘裝船侃綜理詳密多此類又孤竹國在盧龍縣地道記云在肥如南二十里春秋時齊桓公嘗至其地今山海

關北十里有孤竹君墓又姓後漢下邳相竹曾畫譜
竹夢松又錦竹艸名梅堯臣詩雖作湘竹紋還非楚
筠質化龍徒有期待鳳曾無實本與凡艸居偶親君
子室自註此艸也似竹而斑杜甫有從韋明府覓錦
竹詩黃鶴疑竹紀有蒸竹筍墮竹皮類繡文如錦誤
也又一種千里竹高七八寸葉似竹幹似蘆根可以
降火又竹筴菜葉似竹節疎弱不直起開小花深藍
色好生園旁土牆頭人采為茹又石竹子瞿麥也鹿
竹菟竹黃精也玉竹萎蕤也皆名竹不似竹又竹葉

酒名杜甫九日詩竹葉于人既無分菊花從此不須
開又銀竹大雨貌李白詩白雨映寒山森森似銀竹
○竹从倒艸與艸木別為一類王元美云竹于艸木
如魚于鳥獸是也說文冬生艸本艸以竹高大似木
入木部爾雅釋蕩莽附艸屬叢非篇蓄雖有竹名與
竹箭之竹異種詩衛風瞻彼淇澳綠竹猗猗朱傳綠
色也指今竹言淮南子及竹譜皆以為即漢書淇園
之竹其說甚明白酈道元水經注云淇川無竹惟王
芻篇草爾雅竹篇蓄郭註似小藜孫炎引詩作菴竹

說文菴王芻引詩亦作菴竹韓詩作綠薄陸德明云薄篇竹也後世遂誤以菴為王芻以竹為篇筑陸璣詩疏又誤以菴竹為艸名莖葉似竹青綠色高數尺不知菴竹即綠竹非草類綠藹為菴也從朱子詩傳為正篆作林象竹形下叟省作竹小篆改作竹清廖文英

正字通

竹河圖云少室之山大竹堪為甌器今山中絕無竹惟人家園囿有之僅可作笙簫耳嵩書易說卦震為蒼筤竹疏竹初生之時色蒼筤取其春

生之美也

禮記月令日短至則代木取竹箭

周禮春官孤竹之管冬日至於地上之園丘奏之注

孤竹竹特生者

孫竹之管夏日至於澤中之方丘奏之注孫竹竹枝

根之末生者

陰竹之管於宗廟之中奏之注陰竹生於山北者

漢書地理志秦地有鄠杜竹林南山檀柘號稱陸海

為九州膏腴

唐書文藝傳王維別墅在輞川有竹里館

竹山其陽多竹箭

踰次之山其下多竹箭

翠山其下多竹箭

高山其草多竹

京山多竹

蟲尾之山其下多竹

軒轅之山其下多竹

渠豬之山其上多竹

蔓渠之山其下多竹

長石之山其西有谷焉名曰共谷多竹

夸父之山其木多竹箭

荆山其草多竹

大堯之山其草多竹

師母之山其草多竹

漢水重安而宜竹

丘陵坂險不生五穀者以植竹木

三輔黃圖竹宮甘泉祠宮也以竹為宮天子居中

拾遺記始皇起雲明臺窮四方之珍木得雲罔素竹
武夷山記峯山頗有佳竹多蚪屈如龍蛇狀
華陽宮記循壽山而西移竹成林復開小徑至百數
步行有同本而異幹者不可紀極皆四方珍貢又雜
以對青竹十居八九曰斑竹麓
丹鉛總錄竹亦有香人罕知之杜詩風吹細細香李
賀詩竹香滿幽寂粉節塗生翠
越游雜記大平菴看竹俱大如汲桶而毛葉離離不
啻雲鳳之尾

福建志古田縣有馬山多竹可為楮

王荆公於富貴聲色略不動心得耽天隲憲竹根冠
愛詠不已

圖繪寶鑑李夫人西蜀名家未詳世胄善屬文尤工
書畫郭崇韜伐蜀得之夫人以崇韜武弁常鬱悒不
樂月夕獨坐南軒竹影婆娑可喜即起揮毫濡墨橫
寫窗紙上明日視之生意具足自是人間往往效之
遂有墨竹佩文齋廣羣芳譜

麻
中
書
卷
四

